

**HONDAKINAK.** Abenduan onartuko dute Hiri Hondakinen Plana

# Gipuzkoarrek iritzia eman dezaten, prozesua ireki dute

Azaroaren 29 eta 30an eztabaida lantegia antolatu du Aldundiak



GARI GARAIALDE / ARGAZKI PRESS

Jon Mikel Murua Ingurumen diputatua eta Leire Ereño zuzendaria, agerraldi batean.

Erredakzioa | **DONOSTIA**

Gipuzkoako Hiri Hondakinen Plan Orokorriaren behin betiko onarpena eman aurretik, Gipuzkoako Foru Aldundiak gizartearen iritzia bildu nahi du zaborren tratamenduaren inguruan egon daitezkeen hainbat alternatibez.

Horretarako, «planaren hasierako onarpen erabakian ezarritakoaren arabera, gizartearen partaidetza eragiteko prozesu batekin» areagotu nahi dute planaren zabalkundea. Horretarako, Diputazioak eztabaida batera deituko ditu herritarrak eta elkarteak, «hiri hondakinen gaiak dituen arazoak xehetasun gehiagorekin ezagut dezaten, eta, ondorioz, planaren edukiak hobetzeko eta aberasteko proposamenak egin ditzaten».

Jon Mikel Murua Gipuzkoako Nekazaritza eta Ingurumen diputatuak atzo adierazi zuenez, Aldundiak eta Gipuzkoako mankomunitate gehienek —Tolosaldekoak izan ezik— errausteko labeen alde egin dute zaborrei tratamendu bat ematerako orduan. Hala ere, gehitu zuen oraindik ez dakitela zenbat egingo diren, eta ezta non egingo diren ere.

Muruak adierazi zuenez, hilaren 29 eta 30an egingo dute eztabaida lantegia, eta hartara Gipuzkoako gizartearen 120 bat ordezkari gonbidatu dituzte,

era guztietako talde eta eremutakoak: herritarrak, teknikari adituak, eragile ekonomikoak, antolamenduak, mugimenduak eta eragile sozialak.

Eztabaida publiko horren helburuak dira «eztabaida publiko sustatzea, hiri hondakinen kudeaketa eramangarria bideratzeko beharrezkoak diren jorkabideen inguruan»; elkarrizketa gune bat sortzea Gipuzkoako gizarte zibilaren lagin adierazgarri batekin, askotariko ikuspuntuak jasotzeko; parte-hartze sozialaren prozesua ordezkaturik diren sektore eta eremu guztien ikuspuntu komunak eta irtenbide onargarriak identifi-

katzea; hondakinen kudeaketa eramangarria antolatzeko oztopo nagusien gainean eztabaidatzea, eta oztopoak gainditzeko proposamenak aurkeztea; eta hondakinen kudeaketaren esparruan etorkizuneko jarduerak aberasteko ideia eta jarraibide berriak sortzea.

Eztabaida prozesuaren ostean, onartuko dute behin betiko Hiri Hondakinen Kudeatzeko Plana. Jon Mikel Muruak dio plana onartuko dela alegazio eta proposamen guztiekin aberasturik. Hala ere, orain arte jaso dituzten alegazioek ez dutela ekarpen handirik egiten adierazi zuen diputatuak.

**ZABALGARBI**

## Errekurtsoa jarri dute ur hornikuntza sistemaren aurka

Bilboko EB-IUko zinegotzi taldeak errekurtsoa jarri du Zabalgarbi Bilboko errausteko plantaren ur hornikuntza sistemaren aurka. Izan ere, hornikuntza sistema hasi dira antolatzen lan horietarako udalaren baimenik izan gabe, talde ezkertiarrek uste duenez. Bizkaiko Ur Partzuergoak planta horretara ura eramateko hodi sistema hasi da egiten eraikigarri ez diren lur batzuetan, eta gainera udal baimenik gabe. EB-IUk errekurtsoa jartzea erabaki du, Udalak lan horiek egiteko baimenik eman ez duela baieztatu ondoren. Euskal Autonomia Erkidegoko Justizia Auzitegi Nagusia (TSJPV) jarri du errekurtsoa EB-IUko taldeak, eta epaitegiari eskatzen diote lanak bertan behera uzteko, aferaren inguruan erabaki arte. EB-IUk salatu duenez, ur kopuru handia erabiliko dute plantara eramateko.

**HEZKUNTZA.** Ariznabarretarekin bildu zen atzo

## Sarean kexu da, «motelegi» doalako 0-3ren prozesua

Luis Karlos Garcia | **GASTEIZ**

Sarean kexu da, 0 eta 3 urte bitarteko umeen hezkuntza zikloa behin betiko arautzeko prozesua «motelegi» doalako, ikastetxe publikoetako zuzendarien elkarte buru Andoni Lizeagak atzo EGUNKARIARI adierazi zionez, behin Lakuan Hezkuntza sailburorde Abel Ariznabarretarekin bildu ondoren.

Anjeles Iztuetaren bigarrenak ziurtatu zion hilaren 27an emango duela gaur egungo eskola maparen berri, baina hori, Lizeagaren ustez, «prozesua are gehiago atzeratzea besterik ez da, hain zuzen ere, eskaintza publikoaren hutsuneak konpontzeko buru-belarri aritzeko unea izatea behar denean».

Hezkuntza Sailaren jarrera eta komunikatzeko borondatea «on-ontzat» hartuta ere, Lizeagak dio atzoko bilerak «hutsaren hurrengo» izan zela edukiei dagokienez. «Pausoak ez dira beharrezko erritmoan ematen ari», erantsi du.

Ariznabarretak elkarrizketak izan zituen atzo, behintzat, Sarean elkartearekin

eta Euskal Herriko Ikasleen Guraso Elkartearekin (EHI-GE).

Sarean elkarteak 0-3 zikloaren inguruko topaketak egingo ditu datorren astean, Eibarren (Gipuzkoa). Jardunaldiak lan praktikoak eta kontu teorikoak uztartuko dituzte.

Parte hartuko dute, besteak beste, Hezkuntza, Unibertsitate eta Ikerketa eta Etxebizitza eta Gizarte Arazoetako sailetako arduradunek, biek ere zerikusi zuzena baitute aferarekin; azkeneko saioan, gainera, Espainiako Hezkuntza ministroak kargutik kendu zuen Javier Murillo irakaslea ariko da.

**Jardunaldi eta mintegi ugari**

0-3 zikloari buruzko eztabaida puri-purian da, hala erakundeetan nola beste maila batzuetan ere. Hala, atzo hasi eta gaur amaituko da Gasteizko mintegia, eta Mondragon Unibertsitateak, berriz, hilaren 22 eta 23an egingo ditu Arizmendi ikastolarekin batera eratutako jardunaldiak. Haur eskolak umeen gaitasunen garapena bermatzeko behar dituen ezaugarriak aztertuko dira.

## Monterok dio informazioa bidaliko diola Jaurlaritzari

Erredakzioa | **BILBO**

Euskal Herriko Unibertsitatearen (EHUren) 2001-2002ko defizita finantzatzeko programa lantzeko Eusko Jaurlaritzak eskatutako informazioa bidaliko duela adierazi zuen, atzo, Manuel Montero EHUko errektoreak. Era berean, gaineratu zuen errektore taldeak pentsatzen zuela informazio hori Hezkuntza Sailaren esku zegoela. «Nik pentsatzen nuen Hezkuntza Sailak eskatutako datuak bidalita genituela. Hala ere, eskatutako informazioa berriro igorriko dugu, badaezpada», esan zuen EHUko errektoreak.

2001. urtean, EHUk 8 milioi euroko defizita batu zuen osagarrien alorrean; aurrean, berriz, 7 milioi eurokoa dauka. Hori ordaintzeko, hitzarmena sinatu zuten aurreko hilean EHUk eta Hezkuntza Sailak. Defizita nola ordaindu behar zen zehazteko, programa landuko zutela esan

zuten orduan Manu Monterok eta Anjeles Iztueta Hezkuntza sailburuak. Hala ere, egitasmo hori egin ahalizateko, EHUk informazio osagarria bidali behar ziola azpimarratu zuen Hezkuntza Sailak. Besteak beste, hauxe eskatzen zuen: ikasle kopurua, irakasle kopurua, irakasleen prestakuntzarako zegoen egitasmoa...

Hala ere, eskatutako informazioa ez diola oraindik bidali salatu zuen joan den asteazkenean Hezkuntza Sailak. Gutuna ere bidali zion Iztuetak Monterori. 15 eguneko epea eman zion EHUri informazioa igortzeko, eta hori egin ezean, defizita finantzatzeko programa bertan behera geratuko zela argitu zion. Gutuna jasotakoan, «betiko legez», Jaurlaritzari erantzun egingo diola agertu zuen, atzo, Monterok. Halaber, Hezkuntza Sailaren eta EHUren artean arazorik ez dagoela berretsi zuen EHUko errektoreak.